



Vertical text on the right side of the page, likely a title or chapter heading, written in traditional Chinese characters. The text is arranged in a single column and is partially obscured by the binding of the book.



塵談貳錄

凡五十五條

兩湖沈儀著



盛唐詩

應制之詩古今所難以盛唐言之如奉和  
春日幸望春宮之作則蘇頲張說為最奉  
和從蓬萊向興慶宮之作則王維李愷為  
最蘇曰東望望春春可憐更逢晴日柳含  
宮中下見南山及城上平臨北斗懸細  
偏承迴輦慶飛花故落舞觴前宸游對  
獸無極鳥弄歌聲雜管絃張曰別館芳



上苑東飛花澹蕩御筵紅城館渭水天  
靜闕對南山雨露通遠殿流鶯凡幾樹  
蹊亂蝶許多叢春園既醉心和樂共識  
王恩造化同王曰渭水自縈秦塞曲黃山  
舊繞漢宮斜塞輿迥出千門柳閣道迴看  
上苑花雲裏帝城雙鳳闕雨中春樹萬人  
家為乘陽氣行時令不是宸游重物華李  
曰別館春還淑氣催三宮路接鳳凰臺雲  
飛北闕輕陰散雨歇南山積翠未御柳已  
隨天仗發林花不待好風開已知聖澤深

無限更喜年光入睿四詩絕冠當時其他  
詞音雖佳然渾雄不逮矣

唐人題隱逸詩

山林隱逸惟宦情之淡者可與語予竊有志而恨未之遂也暇日讀唐人詩得十首  
若常應物尋孔徵君曰俗吏居閑少同人  
會面難偶隨香署客來訪竹林歡暮館花  
微落春城雨暫寒甕間聊共酌莫使宦情  
闌秦公緒贈張正則曰終年常避喧師事  
五千言流水閑過院春風與閉門山容邀



客桂實落華軒莫強教余起微官不足  
論許渾常處士山居曰斲葉去還歸家人  
半掩扉山風藤子落溪雨荳花肥寺遠僧  
來少橋危客過稀不聞砧杵動應解製荷  
衣常曲村舍曰遠屋遍桑麻村南第一家  
林繁樹勢直溪轉水紋斜竹院晝看笋葉  
攔春賣花故園歸未得到此是生涯賈島  
李疑幽居曰閑居少鄰並草徑入荒園鳥  
宿地邊樹僧敲月下門過橋分野色移石  
動雲根暫去還來此幽期不負言張文昌

秋居曰自知清靜好不要問時豪就石安  
琴枕穿松壓酒槽山情因月甚詩語入秋  
高身外無餘事惟應筆硯勞姚合李頰新  
居曰貧居求賤處深僻在人嫌蓋地花如  
毯當門竹勝簾勸僧嘗藥酒教僕認書簽  
庭際山宜小休令着石添閑居曰不自識  
踈鄙終年住在城過門無馬跡滿宅是蟬  
聲帶病吟雖苦休官夢已清何當學禪觀  
依止古先生溫飛卿盧處士山居曰西溪  
問樵客遙指故人家古樹老連石急泉清



露沙千峯隨雨暗一徑入雲斜日暮雀飛  
散滿山蕎麥花雍國均秋園曰閉門無事  
後此地卽山中但覺鳥聲異不知人境同  
晚花開為雨殘果落因風獨坐還吟酌詩  
成酒已空凡此皆思致清遠襟抱閑曠每  
一長吟于水風山月間有頓忘其鍾鼎之  
念者矣

唐人題僧寺詩

士夫有高致者多喜為方外游蓋其地蕭  
散閑遠足以寄興也然亦惟僧寺為殊勝

道院間一有之多不逮也考之古人游覽  
題咏亦有可見嘗觀唐人詩若春城乞食  
還高論此中閑僧臘堦前樹禪心江上山  
疎簾看雪卷深戶映花閑晚送門人去鍾  
聲查靄間此韞君平題薦福寺禪房也僧  
家竟何事掃地與焚香清磬度山翠閑雲  
來洞房身心塵外遠歲月坐中忘向晚禪  
坐掩無人空夕陽此崔峒題崇福禪院也  
清晨入古寺初日照高林竹徑通幽處禪  
房花木深山光悅鳥性潭影空人心萬籟



此俱寂惟聞鍾磬音此常建題破山寺也  
看盡長廊遍尋僧一徑幽小池無鶴靜古  
木帶蟬秋客至茶烟起禽歸講席收浮盃  
明日去想望水悠悠此劉夢得過鳴琴法  
師院也馮景親切屬句清新談者自當尚  
之

唐宋人中秋詩

待月東林月正圓廣庭無樹草無煙中秋  
雲靜山滄海半夜露寒當碧天輪影漸移  
金殿外鏡光猶掛畫樓前莫辭達曙殷勤

望一墮西岩又隔年此唐人中秋翫月詩  
也其結句感慨可誦至宋人中秋對月則  
曰何處見清輝登樓正午時莫辭終夕看  
動是隔年期冷濕流螢草凝光蟾鶴扶不  
禁雞唱曉輕別下天涯蓋用其意而詞旨  
亦清婉古今人不相及其豈然哉

姚合詩

予喜讀唐姚合詩其五言律中若閑居遣  
懷云永日厨烟絕何曾暫廢吟閑詩隨思  
緝小酒恣情斟看月憐松密垂綸愛水深



世間多少事無事可關心山中寄友生云  
獨坐山阿裏朝朝遂性情曉泉和雨落秋  
草上墻生因客始沽酒借書方到城詩情  
聊自遣不是趁聲名送喻校書云主人庭  
葉黑詩藁更誰書闕下科名出鄉中賦籍  
除山春煙樹衆江晚遠帆踈吾亦家吳者  
無因到弊廬遊春云卑官還不惡行止得  
逍遙情野花侵路春波水上橋塵埃生暖  
色藥草長新苗看却烟光散狂風處處飄  
身被春光引紅時更不歸嚼花香滿口書  
竹粉粘衣弄日鶯狂語迎風蝶倒飛自知  
踈懶性得事亦應稀閑居晚夏云閑居無  
事擾舊病亦多痊選字詩中老看山屋外  
眠片雲侵落日繁葉烟鳴蟬對此心還樂  
誰知乏酒錢武功縣中云簿書多不會簿  
俸亦難消醉卧慵開眼閑行懶繫腰移花  
兼蝶至買石得雲饒且自心中樂從他笑  
寂寥一日看除目終年損道心山宜衝雪  
上詩好帶風吟野客憐知印家人笑買琴  
只應隨分過已是錯弥陳朝朝眉不展多



病怕逢迎引水遠通澗壘山高過城秋燈  
照樹色寒雨落池聲好是吟詩夜披衣坐  
到明假日多無事誰知我獨忙移山入院  
宅種竹上城墻驚蝶遺花蓋遊蜂帶蜜香  
惟愁明早出滯坐吏人傍縣中秋宿云鼓  
絕門方掩蕭條作吏心露垂庭際草螢照  
竹間禽茶罷懶無月眠遲听尽砧還知未  
離此時復更相尋送殷侍郎云詩景西南  
遠秋深晝夜蛩人家連水影驛路在山峰  
溪靜雲生石天晴雪覆松我為公府繫不  
得此相從數詩皆寓新奇于簡淡之中有  
遺思焉考之史合乃崇之孫元和中進士  
及第調功尉善詩世號姚武功迂監察御  
史轉給事中歷陝虢觀察使終秘書監遐  
想其人必有林壑之高情者也

歐陽公王禹玉梅聖俞詩

歐陽公與王禹玉梅聖俞同司禮部考試  
禹玉門生聖俞知友也當時倡和傳播古  
今談者至今尚之若其詩之佳者如歐陽  
公曰紫案焚香暖吹輕廣庭清曉席群英



無詳戰士術技勇下筆春蚕食葉聲鄉里  
獻賢先德行朝廷列爵待公卿自慚衰病  
心神耗賴有群公鑒識精禹玉曰詔書初  
捧下西廂重棘連催暮鑰忙綠綉珥貂雷  
帝詔紫衣鋪蓋案拜宸香卷如驟雨收聲  
急筆似飛泉落勢長十五年前出門下最  
榮今日預東堂聖俞曰分庭答拜士傾心  
却下朱簾絕語音萬蟻戰酣春晝永五星  
明聚夜堂深力搥頑石方逢玉盡撥寒沙  
始見金淡墨榜名何日出金明池苑可能  
尋后世迫于程限拘于禁例局于嫌疑文  
士透迤氣象不復可見矣

歐公論嚴維温廷筠詩

歐陽公與梅聖俞論詩謂造語之工者必  
狀難寫之景如在目前含不尽之意見于  
言外作者得于心覽者會以意殆難指陳  
以言然亦可畧道其髣髴如嚴維柳塘春  
水漫花塢夕陽遲則天容恃態融和駘蕩  
豈不知在目前乎又如温庭筠鷄聲茅店  
月人跡板橋霜則道路辛苦羈愁旅思豈



不見于言外乎二詩今見集中嚴曰蘇耽  
佐邵時近出白雲司藥補清羸疾窓吟絕  
妙辭柳塘春水漫花塢夕陽遲欲識懷君  
意朝朝訪揖師乃酬劉負外見寄也温曰  
晨起動征鐸客行悲故鄉鷄聲茅店月人  
跡板橋霜樹葉落山路枳花明驛墻因思  
杜陵夢鳧鴈滿迴塘乃商山早行也信乎  
意新語工得前人所未道者矣

歐陽公十二月詞

宋歐陽永叔嘗作十二月漁家傲鼓子詞

荆公亟加稱賞元歐陽元功亦嘗追做其  
作二詞並載全集每一展誦則汴京燕都  
歲時風土之美人物俗習之華服食器用  
之盛宛然在目歲晏天寒小齋無事漫錄  
一過永叔詞云正月斗杓初轉勢金刀剪  
綵工夫異稱慶高堂歡幼雅看柳意偏從  
東面春風至十四新蟾圓尚未樓前乍看  
紅燈試水散綠池泉細細魚欲戲園林已  
是花天氣二月春耕昌杏密百花次第爭  
先出惟有海棠梨第一深淺拂天生紅粉



真無匹畫棟歸來巢未失雙雙款語憐飛  
乙留客醉花迎曉日金盞溢却憂風雨飄  
零疾三月清明天婉婉晴川袂襖歸來晚  
况是踏青來屢遠猶不卷秋月別閑深庭  
院更值牡丹開欲遍酴醾架壓清香散  
誰解勸增眷戀東風回晚無情絆四月園  
林春去后深深密幃陰初茂折得花枝猶  
在手香滿袖葉間梅子青如豆風雨時時  
添氣候成行新笋霜筠厚題就送春詩幾  
首聊對酒纓堯色照銀盤溜五月榴花嬌

艷烘綠拂帶雨垂垂重五色新絲纏角粽  
金盤送生綃畫扇盤雙鳳正是浴蘭時節  
動菖蒲酒美清尊共葉裏黃鸝時一弄猶  
鬢髮等閑驚破紗窗夢六月炎天時霎雨  
行雲涌出奇峯露沼上嫩蓮腰束素風蕪  
露梁王宮闕無煩暑畏日亭亭殘蕙炷傍  
簾乳燕雙飛去碧盃猷水傾玉處朝與暮  
故人風快涼輕度七月新秋風露早清蓮  
尚折庭梧老是處瓜華時節好金尊倒人  
間綵綫爭祈巧萬葉敲聲涼乍到百蟲啼



晚烟如掃箭漏初長天杳杳人語悄那堪  
夜雨催清曉八月秋高風歷亂衰蘭敗芷  
紅蓮岸皓月十分光正滿清光畔年年常  
願瓊筵看社近愁看歸去燕江天空濶雲  
容漫宋玉當時情不淺成幽怨鄉關千里  
危腸斷九月霜秋秋已盡烘林敗葉紅相  
映惟有東籬黃菊盛遺金粉人家簾幕重  
陽近曉日陰陰晴未定授衣時節輕寒嫩  
新鴈一聲風又勁雲欲凝鴈來應有吾鄉  
信十月小春梅蕊綻紅爐畫閣新裝遍鴛

帳美人貪睡晚梳洗懶玉壺一夜輕漸滿  
樓上四垂簾不捲天寒山色偏宜遠風急  
鴈行吹自斷紅日晚江天雪意雲亂十一  
月新陽排壽宴黃鍾應管漆宮線獵獵寒  
威雲不卷風頭轉時看雪霰吹人面南至  
迎長知漏箭書雲紀候水生研臘近探春  
春尚遠閑庭院梅花落尽千千片十二月  
嚴凝天地閉莫嫌臺榭無花卉惟有酒能  
欺雪意增豪氣直教耳熱笙歌沸隴上雕  
鞍惟數騎獵圍半合新霜裹霜重鼓聲寒



不起千人指馬前一馬寒空墜原功詞云  
正月都城寒料峭除非上苑春光到元日  
班行相見了朝回早闕前褰帕歡相抱漢  
女姝娥金搭腦國人姬侍金貂帽綉轂雕  
鞍來往鬧鬧馳驟拜年直過燒燈後二月  
都城春動野引龍灰向銀床畫士女城西  
爭買架看馳馬官家迎佛官蘭若水暖天  
鶯紛欲下鷹房奏牒催車駕却道海青逢  
燕怕纔過社柳林飛放相將罷三月都城  
游賞競宮墻官柳青相映十一門頭車馬

並清明近豪家寒具金盤飴墻祭留連芳  
草迳歸來風送梨花信向晚輕寒添酒病  
春煙暝深深院落秋千迴四月都城水碗  
凍含挑初薦瑛盤貢南寺新開羅漢洞伊  
蒲供揚花滿院鶯聲弄歲幸上京車駕動  
近臣準備銜輿從建德門前飛玉腔爭持  
送葡萄馬乳歸銀甕五月都城猶衣袂端  
陽蒲酒新開鴈月傍西山青一搯荷花夾  
西湖近歲過茗雪血色金羅輕汗搦宮中  
畫扇傳油法雪碗絲絲紅玉甲添香鴨涼



糕時候秋生搨六月都城偏畫永轆轤聲  
動浮瓜井海上紅樓歌扇影河朔飲碧蓮  
花肺槐茅潘綠鬢親王初守省乘輿去右  
嚴巡警太液池心波萬頃閑芳景掃宮人  
戶撈漁艇七月都城爭乞巧荷花旖旎新  
棚籠龍袖嬌民兒女校偏相撓穿針月下  
濃粧佼碧玉蓮房和柄拗脯時飲酒醒時  
外淋罷麻稽秋雨飽新涼稍夜燈叫買鷄  
頭炒八月都城新過馮西風偏解驚特宦  
十載辭家衣錦綻清宵半家家搗練砧聲  
亂等待中秋明月翫客中只作家中看秋  
草墻頭螢火爛踈鍾斷中心臺畔流河漢  
九月都城秋日亢馬頭白露迎朝爽曾上  
西山觀蒼莽川原廣千林紅葉同春賞一  
本黃花金千鏹富家菊譜籤銀榜龍虎臺  
前駝鼓響擎仙掌千官瓜菓迎盞伏十月  
都人家百蓄霜松雪韭水蘆菹暖炕煤爐  
香豆熟燔獐鹿高昌家賽羊頭福貂袖豹  
祛銀鼠襪美人來往羶車續花戶油窓通  
曉旭回寒燠梅花一夜開金屋十一月都



人居暖閣吳中雪昏明如罽錦帳豪家深  
夜酌金鷄啜東家撒雪西家暖織指桑長  
宮線弱陽回九九官水鑿尽道今冬水不  
薄都人樂官家喜愛新年朔十二月都人  
供暖筵宮中障面霜風獵甲第歲鈎環侍  
妾紅袖揜笑歌聲送金蕉葉倦客玉堂寒  
正怯曉兆金井水生鬣凍合灶瓢飭一櫟  
吳霜鑷換年懶寫宜春帖

魏仲先詩

魏仲先詩云春暖出茅亭携筇傍水行易

安馴鹿性難辯鬪雞情妻喜栽花活兒誇  
鬪草羸翻嫌我慵拙不解強謀生水閣閑  
登望郊原欲刈禾壞簷巢燕少積雨病蟬  
多砧隔寒溪搗鍾隨曉吹過扁舟何日去  
江上負漁簑達人輕祿位居處傍林泉洗  
硯魚吞黑烹茶鶴避烟閑惟歌聖代老不  
恨沉年靜想相尋者還應我最偏無才動  
聖君養拙住山村臨事知閑貴澄心覺道  
尊成家書滿屋漆口鶴生孫仍喜多時雨  
經春免灌園蓋其為人不慕榮達心迹雙



清故其形諸篇章平淡簡遠讀其詩可以  
得其人神明逸不可並語矣予生平喜誦  
山林詩凡此類皆展玩不釋手者也

薩天錫咏梅寬

薩天錫咏梅寬云枝南枝北夜迢迢飛入  
孤山伴寂寥水月浮香應自返溪風弄影  
為誰招縞衣夢裏和愁斷玉笛聲中逐恨  
銷似欠灵均歌楚些逋仙墳冷草蕭蕭精  
鍊俊拔而且沉麗盖西崑之派歟

祁陽石壁詩

永州祁陽石壁刻一詩字畫飄逸語句奇  
拔相傳以為洞賓所書其辭云宴罷高歌  
海上山月瓢和露浴金丹夜涼鶴透秋雲  
碧萬里秋風一劍寒信非有仙風道骨者  
莫能作也

王元章咏梅詩

會稽王元章國初名士能寫梅其詩清絕  
不俗每自作梅輒題一詩紅梅曰白日遲  
遲照窓戶庭院不知春幾許玉簫聲轉青  
鳥未隔簾踏動胭脂雨墨梅曰我家洗硯



池邊樹箇箇花開淡墨痕不要人誇好顏色只番清氣滿乾坤

祥芷庵題蘿壁山房

德祥號芷庵杭人洪武中高僧能詩善書其題蘿薛山房一絕薛蘿窓下一山房長日惟焚一炷香風在竹簷人在定鳥啣紅子落柴床后以作晚來欲向南軒坐又被蟬聲噪夕陽之詩得禍

明人咏物詩

詠物之詩古今所難以句句欲着題故耳

暇日觀本朝名人詩中得數首張羽詠燈  
花云昼堂銀燭映歌鍾醉眼俄驚火樹紅  
白玉屏深留晚艷絳紗籠暖護春叢闌干  
新淚非因雨狼籍殘煤摠為風更憶禁垣  
歸路靜金蓮隨馬散文虹俞從龍詠桃花  
馬云曾向瑤池駕穆王天風吹入武陵鄉  
絨毛巧簇綵雲暖汗血不消紅雨香千里  
有心追暮景四時無處避春光丰神幻出  
天然態勾引遊蜂逐背忙袁凱詠白燕云  
老去悲來不自知舊時玉樹見應稀月明



漢水初無影，雲滿梁園尚未歸。柳絮池塘香入夢，梨花庭院冷侵衣。趙家姊妹多相忌，莫向昭陽殿裏飛。夏原吉詠馮字云：鬣鬣霜毫抹綠烟，等閑劃破碧雲箋。半真不草長空外，欲斷仍連落照邊。体妙自殊沙上跡，勢高寧似酒中顛。恨無楮素如天濶，寫出蘭庭與世傳。其斷句命意方之謝宗可，諸人抑其班乎。

汪丞相送俞院判詩

江東風日晴，把酒送君行。好慰三千士，將收七十城。烟花催疊鼓，雲騎擁連營。山越

人爭喜，殊方自此清。此汪朝宗送院判俞子茂進兵番易詩也。汪名廣，洋事。我高祖位至中書右丞相，后以罪廢。茲蓋其經畧南徑之時云。

解學士吊李白詩

解大紳學士人傑也，其行實具載揚文貞公所撰墓碣。嘗見其采石吊李白詩云：吾聞學士多風流，豪氣直與元氣侔。金臺殿上拜天子，氣叱寇倖如蒼頭。揚貴妃，捧硯石，高力士脫靴，堯平生落鬼羸，得虛名留



也曾耀翻鸚鵡洲也魯奔却五花馬也曾  
不惜千金裘呼兒換取采石酒花間滿泛  
黃金甌醉來問明月明月全不似大呼王  
侯出東海騎鯨直上八極游我來采石日  
已暮潮生牛渚聊蟻舟白浪一江雪滾滾  
黃芦兩岸風颼颼欲寫佳句吊學士佳句  
滿腹不敢搜恐驚水抵魚龍不得睡天上  
星斗散亂難為收草草留題吊學士學士  
不須笑吾侪磊落與尔俱同儔盖公詩豪  
放跌宕不拘畦徑而此篇人尤傳誦者也

于肅愍咏煤炭

于肅愍公詠煤炭詩云鑿開混沌得烏金  
含蓄陽和意最深爍火燃回春浩浩紅爐  
照破夜沉沉鼎彝元賴生成力鉄石尤存  
死后心但願蒼生俱飽煖不辭辛苦出山  
林觀此公之自負可知矣

聶大年辭四省校文

聶大年先生任仁和學諭日有辭四省校  
文之作名藩較藝遣徵書使者頻頻走傳  
車老大難過大行路平生厭食武昌魚五



羊城古仙游遠八桂林寒木葉疎寄語青  
雲舊知己莫因詞賦薦相如

聶大年詩

臨川聶大年任仁和學官最久好吟咏凡  
西湖兩山及杭城文物之家多留題其詩  
平妥流暢其書真行皆佳故翰墨往往為  
三吳取重所作詩其莊重者若上宗伯胡  
公云正笏垂紳秉至公四朝恩眷極優崇  
天全晚節登台輔帝命春官領秩宗三殿  
曉班簾影外九門寒漏履聲中欲知清靜

無為化尽是君臣一德同其流麗者若讀  
揚廡夫集云文章五色鳳之雛酒借詩豪  
膽氣粗白髮草玄揚子宅紅粧擅板謝家  
湖金鈎夢遠天星墜鉄笛聲寒海月孤知  
尔有灵應不死滄桑更变問麻如其閑曠  
者若游妙行寺云妙行禪寺夾城隈穀雨  
乾時偶獨來一榻白雲松子落滿園黃蝶  
菜花開閑看物態陰情变老被鍾聲旦暮  
催客有可人期不至步随斜日下蒼苔后  
以脩史赴召没于京



張東海閏中秋詩

軋坤似爰太平年一半秋光去復旋玉掌  
重斟今夜月金牋還和舊詩篇留連丹桂  
浮香地擔閣黃花月兩天聞道廣寒人喜  
甚秋來兩度慶團圓此東海閏中秋詩也  
寫景著題思致清遠有古吳豪之風

葉文莊公祀北岳詩

葉文莊公盛清雅簡恪儻然廟堂之望而  
詞翰亦為海內所稱誦嘗奉命代祀北岳  
詩曰靈祠高架五城樓昭代重脩壯北州  
剝落龜龍千古石淋漓牲酒萬家秋神當  
默造斯民福我實叨分聖主憂時雨時暘  
今一月辦香來此若為酬語意渾成當時  
和者不及焉

倪郎中送大常詩

鄭洗馬瑤夫赴南京大常少卿吏部見郎  
中輔有詩云盛名清望玉堂仙甲第才華  
二十年推轂自憐今異古積薪誰問后居  
先清卿進秩官資好白髮承歡祿養便后  
夜奎光定何處大江東去孝陵前鄭在翰



苑資望頗深陞迂不宜居此故其詩及之

### 鄭大常挽詩

鄭大常瑤夫卒于京士大夫多作詩悼之  
張脩撰亨甫一律云一閱遺文慨古今耳  
邊如听澤龍吟半生憂髮江湖遠千里思  
親隸竹深清瑟有絃虛夜月好雲無雨費  
春陰玉樓夢脫秋塵去天上遙應遇嘗陰  
詞旨皆工至如陸少卿弄儀之娥眉半額  
趨時易敝帚千金用世難運斧昔年誰是  
質斷絃今日我空彈尤為士林傳誦

### 陸郎中以詩滑稽

陸郎中杲在刑部時每以文字相滑稽面  
甚黑而齒白如雪或一日金郎中文謂之  
曰黑象口中含玉齒陸郎應聲曰烏龜背  
上列金文滿堂為之絕倒后擢福建叅政  
有詩別諸同寅曰非是區區欲大叅柰緣  
兩鬢雪毵毵諸公側耳朝端听一道清風  
振斗南陸在部年勞甚久其外補亦以言  
語獲罪云

### 以得意詩句擅名



古人以得意詩而擅名當時如鄭鷓鴣趙倚樓張三影之類是已近世杜進士庠咏赤壁有諸葛胷中空有漢曹瞞眼底已無吳之句李西崖目之曰杜赤壁卽戶部珪題詩曰半江帆影落樽前大為詞林所稱賞因有卽半江之號二公蓋一時作家云

韓都憲祠堂詩

韓都憲雍沉毅英特累立戰功兩廣規模大抵皆公所定今梧州有祠王宣谿題二詩云堂堂大節萬夫雄勲業真堪范老同

威振百蠻經畧外手提兩廣笑談中  
幽蘭已死香留谷神劍雖埋氣貫虹  
尚想轅門遺令在邊城笳鼓動英風  
冠珮巍然此丈夫  
秋風亭下掃寒蕪出堂入省今人有北  
伐南征曠世無最蚤知幾全晚節端從  
開府見規模丹黃蕉荔誰登薦后輩通  
家獨愧吾二詩雋永特惜公在兩廣勲業  
炳然而不得載在祀典豈亦有司失于建  
白之過歟

張侍講試院詩



近時試場中主司迫于程限且避物議鮮有以詩篇倡和者雖翰林亦間有之嘗見張冢宰灤為侍講時在順天鄉闈一詩云欽承朝命擅文場紅燭燒殘禁漏長五夜奎章呈瑞彩九天風露散微涼月華委地人千里秋影沉江鴈幾行慚愧白頭無補報才名空玷五雲鄉其詩傳誦于時

陳白沙讀和靖集詩

陳白沙獻章以道學稱一時累徵不就詩文皆平直典雅不復以聲律相高嘗見其讀和靖集一詩有曰廟堂不坐周公旦到處山林有鹿麋北斗收名千古獨西湖送老一枰誰雀知好客來尋主月為踈梅出併詩未肯低頭陶靖節掛懷身外五男兒所謂第一等議論文章矣

厓山大忠祠詩

厓山大忠祠祀宋文信國天祥陸丞相秀夫張傳世傑又有全節祠以祀楊太后誠有閔風教古今懷古厓山詩頗多然亦姚姚牧庵虞道園諸公而止我朝李西涯少



師吳匏庵閣老八詩當為絕冠國亡不廢  
君臣義莫道祥興是靖康奔走耻隨燕道  
路死生惟着衣冠裳天南星斗空淪落水  
底魚龍欲奮揚此恨至今流不極匡山東  
下海洋菜汴城抗國摠丘墟三百年来此  
卜居海内河山非漢有嶺南民物是周餘  
行宮草草慈元殿講幄勤勤大學書辛苦  
相臣經國念有才無命欲何如北風吹浪  
覆龍舟溺尽江南二百州東海未填精衛  
死西川無路杜鵑愁君臣寃辱三朝共夷  
夏興亡萬古讐若遺素王生此世也須重  
紀宋春秋宋家行在日南迁虜騎長驅百  
萬鞭潮海有灵翻佑賊江流非壑枉称天  
庙堂遺恨和戎策宗社深恩養士年異代  
中華須雪耻我皇親為掃腥羶此李詩也  
休指匡山吊戰場忠魂早已過錢塘三人  
可少文丞相一死如前李侍郎毒霧漲天  
浮沴氣落星浮海散寒芒孤墳久矣無杯  
土新庙依然有辨香颺毋誰懷國事憂回  
看夜壑已無舟山河滿地皆胡馬潮汐常



年自海艚空使識書符四廣不教宗社復  
東周孱矣到此誰非死名姓悠悠惜未收  
獨上高丘望大洋曉風吹淚濕衣裳何人  
忍社修降表當日臨危進講章海島全身  
惟叛相潭州無事却勤王史家未識晉燕  
意便把祥興係宋亡厲家千古恨遼金戮  
力終成國步侵鼎足一時撐海角旄頭中  
夜到天心間鬪虎魂空返寂寞魚龍骨  
共沉巨節屢書猶不足欲將遺事托碑陰  
此吳詩也三復展誦使人慷慨悲歌弗能

已鳥者也

西涯題耆英圖

揚邃菴太宰以杜古狂耆英圖索李西涯  
閣老題味李謂以休致未遂每一搆思輒  
太息而止得請后乘輿為之率尔而就還  
此宿逋如釋重負云邃翁風雅天下無索  
我為賦耆英圖問翁此昼誰所作云是江  
東才子烟波徒掃披山川豁蒙翳指點樹  
石開扶踈坐中衣冠尽醇古人物宛似元  
豐初元豐天子文且武文多鳳麟武貌虎



是時民安物方阜平地神仙作官府龐眉  
皓髮照映乎其間亦有分司還解組西京  
會者十二人誑其最壽富與文三朝謀議  
在廊廟萬里跋涉隨風塵兒童走卒職司  
馬齒若最少德則均其餘名位稍差別大  
抵卓犖非常倫傳書好事求入社亦許北  
都王拱辰共言此會為故事起自香山白  
居士宋代唐朝摠帝都普明妙覺皆僧寺  
君看山水鄉文獻地地靈人傑皆天意已  
聞竹帛紀勲名別有丹青照人世東門有

盍復有詩德星堂上兩無之奇縱勝事不  
可以多得後來繼者何其稀遂翁移家住  
京口中歲功名一揮手手持黃帛出關西  
破賊歸來印如斗每當閭闔叫青雲却望  
山林搔白首會將朝為堯舜臣暮作羲皇  
隻金山寺裏半帆風了邛橋邊一尊酒憶  
昔相逢我與翁龍門共謁文僖公公躋台  
衡迓丘壑至今四海聞高風東山草堂有  
遺老亦復超舉如冥鴻同時少年皆老矣  
如翁者此老落落將无同我年差長先登



庸當讓<sup>命</sup>我歸明農聖明在上察誠悃詔許  
大隱都城中此箇此景久未賦歲序有似  
待秋蟲吁嗟乎人生聚散真萍蓬我居薊  
北翁江東猶恐他年同隱不同社四方下  
上不與東墅相追從蓋揚雖索題而李久  
未作至休致后始獲為之也

西涯南行稿詩

李西涯閣老少有盛名于翰林其詩清新  
警拔獨步一時嘗觀南行藁其膾炙人口  
者如岳陽樓云突兀高樓正倚城洞庭春

水坐來生三江到海波濤壯萬木浮空島  
岫輕吳楚乾坤天下句江湖廊廟古人情

中流忽有蛟龍窟卧听君山笛裏聲嶽麓  
寺云危峰高睨楚江千里出羊腸第幾盤  
萬樹松杉雙徑合四山風雨一僧寒平沙  
碧草連天在落日孤城隔水看巢北湘南  
俱在望鷓鴣聲裏獨凭闌滕王閣云滕王  
高閣罷崔嵬誰築西江第一臺雲雨不收  
歌舞地文章空嘆古今才豐城夜氣聞龍  
起彭蠡秋風听鴈來幾欲乘槎問南斗不



知平地有三台金山寺云楚纜吳樯萬里  
還夢魂常在水雲間地當好景多逢寺江  
到中流合有山鷓嶺高秋增突兀龍宮深  
夜鎖潺湲謝公無限登臨興不與蒼生暫  
解顏長向名山憶所逢偶從南國問行蹤  
潮聲夜洛江心寺元氣常浮海上峯玄圃  
樓臺通日月石壇風雨護蛟龍詩成却笑  
張公子解道中流兩岸鍾甘露寺云澗篠  
岩杉處處通野寒吹雨墮空濛垂藤路遶  
千年石老鶴巢傾半夜風瓜埠樹來江口

斷金陵潮落海門空閑書未報三邊捷悵  
望中原指顧中

匏庵詩

吳匏庵詩脫去吳中故習觀其諸作若雨  
中游太湖云孤蓬遙蹕大湖心着雨高山  
水墨深積氣上薰炊正熟弱沉西注壓將  
沉不因迢迤辭清賞偏愛空濛助醉吟詩  
裏白公誇月夜未知奇觀屬春陰史館歲  
暮云高館水生硯沼堅盈箱公案摠陳年  
法家有事多成獄史學無能強入編戶外



龍文雲氣滿殿頭，鷓鴣日華鮮。殘冬坐此  
嗟，何補寂寞全。勝著太玄過西苑，云松偃  
瓊臺，不受塵。虹橋綽楔記通津，瀛洲水滿  
分。禪海靈囿垣，長接禁宸虎圈。久閑空獸  
簿，龍舟狝泛靜魚綸。賞花未許陪游幸，誰  
羨賡歌作宋臣。送嚴戶部出守西安云出  
守何曾為一麾，山公高薦久相知。漢家輔  
郡先京兆，唐室才名重度支。極北朝廷通  
奏疏，終南堂紀入歌詩。他年廳壁題名姓，  
誰獨令人有去思。送李郎中擢府丞云清

班綴立色無慚工，署徊翔意自堪。名厲山  
公終啓事，身隨韓子不葦參。旧開輔郡依  
江左，遙望神京傍斗南。壯歲要知功業盛，  
看君黑髮正勝簪。王守溪評其詩謂寄興  
閑遠，不為浮艷之語。用事精切，不見斧鑿  
之痕，可謂知言。

滄洲靜逸詩才

張滄洲亭父陸靜逸昇儀在翰林，賸有詩  
名觀喜雪。焚香聯句時同會者，倪青溪舜  
咨李石城世賢。程篁墩克勤陸冶齋廉伯



皆海內名家而二公鈞竒競勝佳句疊出  
如喜雪中同出聯祖禰分飛忽參商長河  
飮堅腹斷嶺橫截昉焚中拗深隱隱金粟  
火褪委紅鹽輸情已繩直遜意仍蛟潛大  
抵多二公語也惜乎皆不壽以沒知言君  
子蓋每為天下悼云

滄洲詩

成化中翰林詩才多于張滄洲亨父屈指  
雖西涯亦推重之蓋不獨格律之高亦其  
人品可尚也已今自其詩觀之若雪后早

朝日長安陌上早趨朝珂馬衝寒雪未消  
凍鳥候晴鳴御苑素華凝瑞壓宮梢氣凌  
仙仗朝儀肅光沁瓊樓曙色饒回望蓬萊  
初日麗五雲當殿擁璫瑤元旦侍朝日嚴  
陞重門入候朝曉寒惟听珮聲搖清香畫  
燭通三殿素簡朱衣立九霄星斗回環宸  
極正風烟懸隔下方遼未明丹宸龍光動  
臣在仙宮侍聖堯則可知其麗則呂梁洪  
曰巨灵劈斷大山根一派洪流浩劫存萬  
虎嘯風搖地軸六龍驅雨過雷門馮夷窟



宅愁波漏水帝銜輿向海奔人力易穷天  
險在英雄回首合銷魂金山曰七月江天  
秋氣清妙高臺上坐江聲東來海色扶金  
島西去山形拱石城碧樹岫巒留雨潤夕  
陽樓閣映波明憑虛未了東周意不問無  
生問有生則可知其豪邁翰林齋宿和匏  
庵曰仙漏春聲出禁林玉堂月色警齋心  
風收篆縷浮烟直人靜燈花落夜深遲暮  
宦情看彩筆餘寒詩思在重衾禮成遙听  
龍頭賦珎重才名耀古今和宣谿曰齋宿  
詞垣奉帝誠曲房幽坐道心生微軀也恋  
塵中夢淺學堪愁紙上名皎皎春星當夜  
落沉沉仙漏到床清許身夔契諸公在老  
大徒傷子美情則可知其典雅至于觀其  
朝回曰朝回布襪一官閑近闕清門不用  
閑沒膝雪騎寒馬過滿鱗冰買凍魚還得  
沾微祿強賒酒不起高樓亦看山明日又  
迎長至節獨愁空使二毛斑清景曰急雨  
飄風小作寒依然清景在人間通宵睡起  
看明月連日朝回見好山愧我晚于詩律



細可誰秋半酒盃閑本無能事求知已敢  
惜微官了壯顏閒述曰供奉常依玉陛晨  
逍遙誰厭是閒臣古來文字從頭玩天下  
賢才任意親樂地靜惟歌帝力宦途生不  
拜思人豈勞觀望為欣戚多病今成寡欲  
身偶成曰遲日烘庭漸不寒朝回坐慣出  
門難非才豈合邀狂譽散地猶慚是羨官  
好夢每因春困足病懷時藉酒醺寬逍遙  
事外歌全盛史帙深勞耆俊看則其識趣  
之恬淡行履之端方又可見矣因言不可

以知人哉

送邃庵詩

揚邃庵以中書省墓還儲柴墟靜夫有詩  
送之曰白下逢君病眼明襟期何必問平  
生簿書即署多慚我旗鼓詩壇合避兵天  
末松楸游子夢筆端山水少年行長安走  
馬明朝去江草江花萬里情及以副憲督  
學陝西陸冶齋庶伯有詩送之曰夢隨飛  
鶴到關西文印年來手再提為士得師爭  
貴賤入群求馬亂黃驪晉人餘馥猶薰鄙



秦塹寒芒正逼奎  
驄馬蕭蕭明日路  
清塵回首華山低  
二詩雋永可誦不愧名家

彭幸庵題淮陰祠

彭幸庵司馬慷慨有大節  
公暇績學種文手不付卷  
嘗見其過淮陰侯祠一詩曰  
鳥足封侯日不是  
登壇拜將時  
既肯正言辭  
削徹何須執手教  
陳豨未央一片英雄血  
只有春秋老筆知  
詞旨雋永議論正大可謂詩史

是危機須知躡

見素三詩

見素司寇文章謹嚴古雅詩復深厚渾雄  
其間木齋致仕曰疏歸前日已東山今日  
先生又乞閑三五治臻霄漢上百千心切  
水雲間閑河老淚懸憑几文武遙心注押  
班好為先皇慎眠食仰成天子要公還賀  
東山赦歸曰九千驛路七旬年胡馬牛車  
雜后先俛仰已無身世望為訶終有鬼神  
憐賜環沙漠傳溫詔鼓柝烟波領素緣賊  
肉不餘公尚健小籬萸菊正芳鮮與揔戎



論兵曰玉書黃組重江城躍馬西來話甲  
兵烟水頗疑种放迹華夷深識令公名石  
林野清清綠淺綉服戎裝老氣橫宣力世  
臣優閒寄飼牛容放薄山耕觀是三詩知  
其為人矣

馮佩之咏梅詩

馮雪湖咏梅詩苔石崔嵬卧石墻一天冰  
月照西堂巡簷意氣應相許放鶴風情或  
可當舊券獨遺清事在賞心誰共老夫償  
百杯狼藉花能笑想見公餘晚更狂馮名

蘭字佩之以翰林吉士歷任提學

何李二大家詩

正德以來作詩以李崆峒何大復為首稱  
李之古豪邁跌宕直陵漢魏何之律清新  
警接進步盛唐其尤佳者李詩如帝京篇  
曰古時灞水即盧溝今代車書似水流日  
間五色龍文氣天上春開五鳳樓漁陽北  
塞古風沙二月春風萬柳斜薊門轉作長  
安苑燕桃開出五陵花慷慨燕雲十六州  
天門北極帝星頭胡塵一洗桑乾靜萬載



朝宗四海流山作青龍左右盤扶桑西影  
拂桑乾日月光華朝萬國天雷北海作長  
安天皇按劍拂金鞍飲馬追胡瀚海乾歸  
來並立擎天柱不數劉家承露盤胡后粧  
接換上陽春風珠箔舞垂楊半夜開城歸  
萬馬至今迷失幾鴛鴦今朝望海海雲生  
五色雲中白玉城金陵巧接盤龍勢南北  
何如漢二京塞上星飛化羽林鼓音咸作  
管簫音將軍把劍聞鷄舞玉女朱樓學鳳  
吟高鼻胡奴入漢閑皂旗千隊射雕還君  
看萬古昏星月洗出中華壘翠山自從黃  
帝破蚩尤涿鹿雲黃黑帝愁盤石果然為  
左右幽州常作帝王州何詩如長安望月  
日中秋高宴會客散向長安皓月千門裏  
青天並馬看明添花蓋亂陰益柳條繁悵  
望高雲上何由振羽翰春雪日正月燕京  
雪飛花落滿筵輝輝映旭日脉脉向春天  
苑草寒猶細宮雲晚更鮮中原有戎馬何  
日凱歌旋城東泛舟日水郭移尊宴沙原  
列騎停岸開來放舸林轉曲通亭雨意雲



垂白風情柳送青衣冠夕臨泛東望極滄  
溟齋宿興隆寺曰疊雪霏雲磴陰霞絢石  
房沉冥通別理宴息坐焚香暖色含初篠  
暹烟散遠揚齋心臨暮景屬意向春陽晚  
出左掖曰洞門餘積雪御院復高霞吏散  
層霄上城行五鳳斜青回初霽柳紅動峭  
寒花立馬清沙外宮林集暮鴉其他累帙  
連篇膾炙人口誠宗工哉

何仲默鮒魚詩

五月鮒魚已至燕荔支盧橘未應先賜鮮

遍及中璫第薦熟誰開寢庙蓮白日風塵  
飛駟騎炎天冰雪護江船銀鱗細骨須憐  
汝玉筋金盤敢望傳此正德中何仲默賦  
鮒魚詩盖有感時事得諷諫体也

趙半江遊西湖詩

趙半江提學泛西湖詩曰輕舸翩翩畫裏  
行烟波如酒醉詩情磬飄雲外林歲寺山  
缺湖東樹遶城花下人閑鷺自語雨中春  
去草猶生款携賀老蒼龍杖直上高峯頂  
上橫可謂文采不群矣



二泉題馬

邵二泉先生不特文章高出而杯酌談笑  
之間亦風流醞藉嘗憶在江西臬司暮訪  
家君留之小坐酒半因出松雪翁畫馬相  
視公醉而歸次日以一詩為謝云省齋夜  
宴新春時錯出佳味如其詩詩成擁袖哦  
未已廣庭月在梅花枝酒邊看昼驚絕倒  
瘦馬爭誇松雪老尊前伯樂是何人東風  
吹綠江南草

王守溪桃花詩

王守溪先生在翰林時小園桃花開作詩  
曰春來未識東風面忽在吾家小圃中斜  
凭闌干成獨笑東西相映兩株紅花開猶  
未報人知花下行吟漫自思花若能言應  
笑我年年無酒只題詩朝陵欲去更遲遲  
還向花前舉一卮說與東風莫吹落我行  
三日是歸期及花落又作詩曰報道花開  
方自喜忽聞花落更成傷東風大是無情  
物故作春來一日狂昨日日高猶爛熳今  
朝風動漸稀疎我行三日歸來看只恐枝



頭一片無魚鱗滿地雪班班蝶怨蜂愁鶴  
慘顏只有道人心似水花開花落摠如閑  
則公雖鯁介謹嚴然風流文彩亦自可見  
矣

王陽明詩

陽明王公天資高邁才子也追其晚年學  
道始脫去詞章之習凡詩文所作達意而  
已嘗讀其南都以前詩若遊浮峰寺曰一  
卧禪房隔歲心五峰烟月听猿吟飛湍映  
樹懸蒼玉香粉吹松落細金翠壁年多霜  
蘇合石林春尽雨花深勝游過眼俱陳迹  
珍重新題滿竹林移居勝果寺曰江上但  
知山色好峰迴始見寺門開半空虛閣有  
雲住六月深松無暑來病肺正思移枕簟  
洗心兼得遠塵埃富春咫尺烟濤外時倚  
層霞望釣臺病餘巖閣坐朝曛異景相新  
得未聞日脚倒明千頃霧雨聲高度萬峰  
雲越山陳水當吳嶠江月隨潮上海門便  
欲携書從此老不教猿鶴更移文用徐曰  
仁韻曰每逢佳處問山名風景依稀過眼



生滯霧忽逢千嶂暝夕陽偏放一溪晴晚  
投巖寺依雲宿靜愛楓林送雨聲夜久披  
衣還起坐不禁風月照人清登閣江樓曰  
絕頂樓荒舊有名高皇曾此駐龍旌險存  
道德虛天整守在蠻夷豈石城山色古今  
餘王氣江流天地變秋聲登臨授簡誰能  
賦千古新亭一愴情遊清涼寺曰春尋載  
酒本無期乘興還獾馬足遲古寺共憐春  
草沒遠山偏與夕陽宜雨晴間竹消蒼粉  
風暖岩花落紫蕤昏黑更須凌絕頂高懷  
相見少陵詩豪吟麗藻獨步詞林以詩言  
則公固以名家况其有耿耿弗磨之勲列  
矣乎

李平軒龍井詩

李平軒方伯在浙省時公暇輒為山行遇  
適興處卽走筆題咏兩山佳處徃徃有之  
嘗見其龍井一詩曰帶雨拖雲入翠微茲  
遊煤蘖已多時得觀龍井非為晚無補薇  
垣敢怨遲弗國還輸三竺勝僧房何少二  
泉詩山深昼靜成歡劇閑酌清泉當酒卮



况其政事亦復精絕惜為逆瑾所屏賈志以沒可慟也已

西涯篁墩和東坡雪詩

東坡雪后二詩古今絕唱近見西涯篁墩兩學士皆和四章西涯若祗樹未春花作雨解池初夜水生鹽陸海平翻千頃浪江梅亂落滿城花物華隨地歛穠纖白戟壇空未解嚴篁墩若因風不惜泥沾絮到竹時驚若裹鹽地堆龍甲成沙陣風剪鷺毛作罽花頗覺南朝語更尖印泥鴻瓜任交

義之類皆佳句也

鏡川碧川對掌翰林詩

弘治初鏡川楊公守陳以少詹事視院篆碧川楊公守陞以侍讀掌南京翰林搢紳相語以為兄弟對掌南北詞林近世所未有碧川有詩曰天風吹斷鴈鴻行霄漢平分兩玉堂小第初懷南署印大兄又縮北門章纍纍不是權家客燁燁同依帝德光仰止前脩稱二趙絲綸對掌並沅茅

文衡山詩



姑蘇文徵明永嘉守宗儒之子詩益筆札  
見稱于時且肅行檢勵志節不涉迹于權  
貴之門海內從而重之嘗見其數詩其一  
謝寄宜興茶小印輕囊遠寄遺故人珍重  
手親題暖含烟雨開封潤翠展捨旗出焙  
齊片月分明逢諫議春風彷彿在荆溪松  
根自汲山泉煮一洗詩腸萬斛泥其二謝  
送惠山泉有客遙分第二泉分明身在惠  
山前兩年不挹松風面百里初回雪夜舡  
青箬小壺水共裹寒灯新茗月同煎洛陽

空說曾馳傳不信緘來味尚全其三雪夜  
勺惠泉試陽羨茶醉思雲乳不能眠活火  
沙餅夜自煎白絹旋開陽羨月竹根新汲  
惠山泉地爐殘雪貧陶穀破屋清風病玉  
川莫道年來塵滿腹小窓寒夢已醒然其  
四謝寄溫蘭草堂安得有琳琅傍岸倚蘭  
奕葉光千里故人芳解佩一窓幽思自生  
香夢回涼月甌江遠思入秋風楚畹長漸  
久不聞餘馥在始知身境兩相忘其五溫  
蘭為借去不還誤遣幽芳別主翁歸期寂



冥小庭空美人自被鉛華累君子應憐臭味同結珮誰家搵夜月返窳無路托秋風也知尤物非吾有醉誦離騷似夢中徵明今膺貢上京被薦授翰林待詔云

文衡山憑虛閣詩

南京鷄鳴寺在城西北山上其憑虛閣尤高爽軒豁凡宮闕城市一覽在目文衡山徵明有詩最為士林傳誦云金陵佳麗石頭城傑閣登臨正雨晴帝業從前稱虎踞游人選勝得鷄鳴長江天際孤帆滅落日烟中萬瓦明滿目廢興題不尽獨看明盡遠郎行此詩此閣可謂兩佳矣

林小泉詩

東園冠蓋集群英憶別吳門歲幾更愧我黃堂無善政多君青眼有餘情停驂每荷深投轄過鴈時聞遠寄聲刺史官階今六轉相逢猶自頌專城此小泉林公庭掃詩也公嘗守吳嘉靖庚寅晉位南都少司馬吳人仕南都者相率醵金為會公因作此以謝云



周貞庵詩

南京刑部后堂素屏周貞庵司寇大書重  
過法司一首云貫星門迥未須尋光景依  
稀昔似拿揚柳綠猶春路遠薇花紅尚午  
堂深無邊躍鯉翻清沼不斷啼鶯繞紫林  
老我重来圖畫裏卅年無補愧初心周自  
南臺擢北部坐與時忤改而南亦足多也

呂太守西湖詩

呂太守夔守杭日泛湖詩負郭千家半酒  
壚坡礫碧色是西湖平村樹擁開簾幙隔

浦山行入畫圖苕蕒水清跳雨鱖荻菱風  
急下霜鳧並船穩載游人去安得官閑一  
事無呂西江人有詩才任未久以憂去卒  
于家

石田落花詩

石田落花詩三十首比擬親切思致高遠  
其尤膾炙人口者若富暹穠華滿樹春香  
飄瓣落樹還貧紅芳旣蛻仙成道綠葉初  
陰子養仁偶補燕巢泥薦寵別脩蜂窠水  
資神年年為尔添惆悵獨是蛾眉未嫁人



是誰揉碎錦雲堆着地難扶氣力頹懊惱  
夜生听雨枕浮沉朝入送春杯梢傍小剝  
鶯還掠風背差遲鳩又催瞥眼與亡供一  
笑竟因何落竟何關玉勒金罍已倦游東  
飛西落使人愁急挽春去先辭樹懶被風  
扶強上樓魚沫劬恩殘粉在蛛系牽愛小  
紅留色香久在沉迷界懺悔誰能倩比丘  
夕陽無那小橋西春事闌珊意亦迷錦里  
門前溪好浣黃陵廟裏鳥還啼焚追螺甲  
教香史煎帶牛酥嚼膳奚萬宝千鈿真何  
惜歸來直欲滿筐携一時名家和者頗多  
莫能過也

孫太初失鶴詩

孫太初関中人浪游江湖凡山水奇勝處  
寄迹焉士夫多與之游暮之者以為有林  
逋种放之風詩亦工若嘗見其失鶴詩云  
只在秋江上長吟首百搔避烟茶已熟窺  
户月初高山角聞孤笛湖陰夢小舸此時  
還憶汝把酒具空蒙只在秋江上烟霞幾  
萬重階前留墮羽苔面想行踪雲影忽傍



水月明猶在松此時還憶汝跨我出樊龍  
他作佳者尚多不幸死矣遺集行世

謝子象節婦詩

金陵謝子象有詩才嘗見其題慈節詩云  
朗日行天夜照星私嚴淵默竦雷霆苦經  
世故艱危地要保人生婦女形萬事到終  
頭已白九原識面眼猶青敢偷一死全遺  
息莫道冥冥夢不醒廢幾擺脫陳俗而不  
拘拘用事者

唐子畏詩

庚寅子畏吳人有詩才昼亦清絕弘治戊  
午發解南畿后坐事除名愈亦自放于詩  
酒間嘗見其詩曰寬博衣裳首希盤十年  
塵暗竹皮冠周公已出無三惡范叔相逢  
有一寒墻角短檠和我弃間壁長鈇何誰  
彈草萊消盡英雄悉北斗珊珊拄頰看擁  
鼻微吟水上樓不堪重憶昔年遊三更中  
酒半床病二月傷春滿鏡愁白面少年期  
馬革黃金說客剽貂裘翻思湖海飄零處  
飛葉僧床細雨舟

都將



心事付滄浪內園歌舞黃金盡南國飄零  
白髮長燈照暗塵人渺渺露迷溫月夜蒼  
蒼不才贏得腰堪把漫對緋桃檢藥方蘇  
有七才子寅在其列云

夏大理贈先君詩

先君以秋官謁告還京夏大理時正詩送  
之曰重慶堂前忍別離聖恩深渥敢言私  
俯焉玉陛瞻天近曠矣青雲得路遲經史  
自堪文案牘刑名無忝佐雍熙廟堂梁棟  
須松栝執手無忘遠大期暨僉憲江西亦  
有詩贈曰昂霄聳壑不凡材奮滿秋司陟  
外臺豕冕繡裳年甚富霜威鉄面印新開  
雲飛南浦懸孤月雨過西山絕點埃翼軫  
有時沾法軌紫薇垣山接三台夏杭城前  
輦文學法理之綽有可觀者也

陳匯之贈先君詩

陳武選洵送先君憲僉江西詩云陞薛清  
曉出神州聞道豺狼已避騶水操寒生高  
漢月綉衣光動故園秋髻年朋舊惟青眼  
汗竹勲名未白頭却喜西江十三郡監司



先得馬懷柔陳世家子與先君同明同官  
后改謫知州卒

程篁墩贈先君詩

弘治初先君以僉憲謫判徽州侶公鍾亦  
以亞卿謫知府事相得甚懽暇日邀程篁  
墩飲程贈詩云百雉山城兩謫居一尊相  
屬晚秋餘侵人白髮憑多少閱世浮雲自  
卷舒林下正容吾輩拙天涯誰說故人踈  
遙聞聖主覃恩詔擬逐田翁歛使車時程  
因言者亦以學士歸田未幾佾公召陞廷  
尉先君擢僉廣臬而程亦賜環矣

王宣溪贈先君詩

家君自廣西廉憲擢廣東左轄王宣谿送  
以詩韻險句工和者不及最后沈大史燾  
奉使至廣追和一律庶幾敵手謾錄于此  
王詩曰雲路低回四十年青春相與到華  
顛所嗟落落晨星少自保亭亭晚節堅恩  
命會應教補衮病夫準擬疏歸田一尊不  
盡緜袍意極目烟江思惘然沈詩云旬宣  
來日正豐年嶺海群黎喜欲顛明月滿輪



光共皎黃金百煉質同堅隨行有伴惟琴  
鶴奔命無心問舍田我何春風中坐久知  
君標恪獨巍然

胡太載見寄詩

求新胡錦輅大載有才名先君副憲江西  
時亦重其人錦輅嘗以詩寄予曰文采翩  
翩迥不群囊書千里拜休文華堂彩服三  
年別黃卷青燈五夜勤西浙人材今古盛  
求明世業后先聞凌空六翮應脩健看挾  
長風戾五雲日麗丹山鳳出群春深玄谷

豹成文青黎吐焰歲脩久絲筆生花著作  
勤佳句曾于詩帙見長才每共行在聞神  
交自許人猶遠越樹離離礙楚雲蓋俯仰  
二十餘寒星謗劣無似甚有愧于知己矣



Large stylized watermark or seal impression, possibly reading '圖書' (Library/Book) in a decorative font.

Small square seal impression in seal script, likely reading '上海圖書館藏' (Collection of Shanghai Library).



